

«Accents» vulan far punts tant intern sco extern

La nova gasetta da chasa da Radio e Televisiun Rumantscha (RTR) e SRG.R

■ (anr/gc) **Gia ad emprima vista sin ils «Accents», la nova gasetta da chasa da RTR e da SRG.R., percorschan ins spert che profis han giu en qua la detta. Questa publicaziun, che cumpara quatter giadas ad onn en na main che 3000 exemplars, è fatga grafica-main stupent.** Ella cumprova che collavuraturAs dals meds da massa electronics rumantschs chapeschan oraifer da far lavur publica (PR) cun render attent a lur incarica fundamentala e tras sa dar fadia da vender bain lur gronda prestaziun. Ils «Accents» vulan dentant esser in med da communicaziun tant intern per passa 150 collavuraturAs ed er externmain far punts tar persunas-clav da nossa societad ed insumma vers tuts attaschads a RTR. Finamira da questa ediziun è da preschentar acziuns e programs sco era dad annunziar midadas e mutaziuns sco quai ch'il director da RTR, *Mariano Tschuor* – ch'astgass esser l'iniziant da la nova publicaziun – retegna en l'editorial.

Rapportar d'ordaifer e novas emissiuns

Suandantamain sa tracta i be da dar insaquants schatgs dals emprims «Accents». Sin la frunt vegn preschentà il «battaporta e ses fans sin facebook». Cifras impressiuantas èsi per la plattafurma d'internet da quella rait uschè populara. RTR sa renda enta mez ses public per rapportar live dad exposiziuns sco la Higa d'uonn a Cuira, da la Muma (musada e mastregnanza) il matg ad Andeer e sa chapescha dal 42. maraton engiadinais. Ina novaziun è l'Album en ils «Contrasts» da la Televisiun cun rapportar da-



Frontispizi da la brochura «Accents».

vart tge che capita durant in di en in vitg. L'emissiun zunt originala Fitta Foffa lascha gidar in di or *Livio Foffa* tar las lavurs en fatschenta u chasa e rapportar live surlonder al RR.

Da mutaziuns, impressiuns ed experientschas

Sut titels fitg originals stattan plets plain renconuschientscha da cumià per ils collavuraturAs: *Theo Haas, Renata Decurtins,*

sco era per *Maria Cadruvi* ed *Andreas Joos*. InsaquantAs collavuraturAs pon festivar giubileums da lavur da 5 fin 20 onns, auters bandunan e dus entran en servetsch tar RTR. Vast spazi vegn dà a la nova emissiun «Minisguard – in Teleguard per ils uffants, dentant betg mo». RTR sa participescha a la tschertga dal pled rumantsch da l'onn ed ha era gidà a rimnar meds per Haiti. Che *Dario Cologna*, l'emprim campion olimpic rumantsch en ina disciplina singula, vegn allegà è chausa clera. *Isabella Wieland* descriva impressiuns da sia emprima moderaziun directa dad ina «chista» (jargon professional) l'emissiun «La chanzun rumantscha» da Ligiun/Comano. Quai haja chatschà na pauc l'adrenalin e stà il vair kik. – *Bertilla Giossi* constatescha che ses film davart «I va a fin – las soras dominicanas da Glion», las haja irrità, trumpà, stridà ed inquietà. Ella na vuleva betg far entiert. Tuttina saja i schabegia – e quai, uschè sincera ella, fetschia mal il cor.

Onn per onn envida RTR ils anteriurs collavuraturAs, restads fidaivels era suenter la pensiun, ad in inscunter. – Ina contribuziun lascha passar revista il temp e nums dals renumads showmasters internaziunals, svizzers e rumantschs cun lur emissiuns nunemblidaivlas. – Dapi Bumaun 2010 ha era SRG.R ina nova structura – e statuts cun in tant damain cumpetenzas ed autonomia per las regions.

En pietad vegn regurdà al defunct Clemens Pally, in um bufatg e da verva genuina, sco el vegn caracterisà uschè reussidamain, ch'è stà blers onns manader dal post da programs da CRR/RTR.